

Динимизнинг гўзаллигига боқинг!



12:05 / 07.07.2025 2102

Абдуллоҳ ибн Умар розияллоҳу анҳумо Мадинадан Маккага қараб йўлга чиқди. Туяга миниб олган, ёнида эшаги ҳам бор эди. Туяси чарчаганида эшагини минарди. Бошида салласи, эгнида бежирим чопони бор эди.

Йўлда саҳройи бир йигит учради. Абдуллоҳ ибн Умар розияллоҳу анҳумо унга:

- Сен фалончининг ўғли эмасмисан?! -деди.

У:

- Ҳа, мен ўшаман! -деб жавоб берди.

Абдуллоҳ ибн Умар розияллоҳу анҳумо унга деди:

– Мана бу эшакни ушла, у сенга. Мана бу саллани ҳам бошингга ўраб ол. Мана бу чиройли чопон ҳам сеники!

Аъробий йигит нарсаларни олиб кетгач, Абдуллоҳ розияллоҳу анҳунинг ҳамроҳлари сўрашди:

– Аллоҳ сизни ислоҳ этсин! У бир аъробий бўлса, уни озгина нарса ҳам хурсанд қилар эди. Унга озгина мол ва таом бериб, эшагингизни, саллангизни ва чопонингизни ўзингизга олиб қолсангиз бўларди!

Абдуллоҳ деди:

– Унинг отаси отам Умар ибн Хаттоб билан дўст эди. Мен Расулуллоҳ соллаллоҳу алайҳи васалламнинг шундай деганларини эшитганман:

هَيَّا دَوْلَةً لِّجُرَّةِ الْعَصْرِ رَبِّ الْعَالَمِينَ

«Яхшиликларнинг энг яхшиси киши отасининг дўстлари билан алоқа боғлашдир».

Имом Муслим ривояти.

Динимизнинг гўзаллигига боқинг!

Ахлоқнинг гўзаллигига боқинг!

Яхшилик дегани бизнинг динимизда ота-онанинг фақатгина тириклигида яхшилик қилиш эмас, балки ўтганларидан кейин ҳам уларнинг дўстларига, уларни яхши кўрадиганларга яхшилик қилишдир!

Ибн Умар розияллоҳу анҳумонинг отасига қилаётган яхшилигини қаранг! Унга йўлиққан аъробий йигит унинг отасига дўст эмас эди, отасига дўст бўлган кишининг ўғли эди. Шундай бўлса-да, унга катта яхшилик қилди. Энди отасининг дўстини кўриб қолганида борми...

Абу Усайд Ансорий розияллоҳу анҳудан ривоят қилинишича, Расулуллоҳ соллаллоҳу алайҳи васалламнинг ҳузурларига бир киши келиб деди:

– Эй Аллоҳнинг Расули! Ўтиб кетган ота-онамга яхшилик қила оламанми?

Набий алайҳиссалом дедилар:

– Ҳа, албатта! Уларнинг ҳаққига дуо қиласан, истиффор айтасан, уларнинг аҳдларини ижро қиласан, дўстларини эҳтиром этасан, улар орқали силаи

раҳм қилинадиганлар билан силаи раҳм қиласан!

«Яхшиликнинг энг яхшиси»ни қизғанманг. Ота- онангизнинг дўстларига, аҳбобларига қаранг. Улар билан алоқа ўрнатинг. Онангизнинг дугонаси бемор бўлганда зиёратига келсангиз, бу қандай ҳам ажиб яхшилик бўлади! Сиз гўё унга «бир кўз учун минг кўз икром қилинади», дегандек бўласиз!

Вақти-вақти билан отангизнинг дўстини зиёрат қилиб турсангиз, бу қандай буюк яхшилик бўлади! Уларни йўлда кўриб қолсангиз, уларга очиқ юз билан қўл узатсангиз, эҳтиёжлари борлигини билиб қолсангиз, уларга ёрдамга шошилсангиз, нақадар улуғ иш бўлади бу!

«Набавий тарбия» китоби асосида тайёрланди

Ушбу китоб Ўзбекистон Республикаси Дин ишлари бўйича қўмитанинг 2023 йил 7 мартдаги 03-07/1506-рақамли ва 2023 йил 24 мартдаги 01-07/1959-рақамли хулосалари асосида тайёрланган.